



---

Broj: 02,03,03/11-05-1-345/11

Sarajevo, 4. 4. 2012.

Predmet: Izvještaj sa 14. sastanka Asocijacije evropskih senata,

Pariz, 15.-17. marta 2012.

Delegacija Parlamentarne skupštine BiH, u kojoj su bili predsjedavajući Doma naroda Dragan Čović i zamjenik predsjedavajućeg Ognjen Tadić, aktivno je učestvovala u radu 14. sastanka Asocijacije evropskih senata, održanog od 15. do 17. marta 2012. u Parizu.

Prije početka rada predsjednici su izrazili duboko saučešće kolegi Dannyiu Pietersu, potpredsjedniku Senata Parlamenta Belgije, zbog tragične smrti 28 osoba u autobuskoj nesreći, među kojima su nastradala 22 djeteta.

Na 14. sastanku Asocijacije evropskih senata razmatrane su sljedeće teme:

- Imaju li parlamenti ulogu supervizora u upravljanju eurozonom?
- Kakav oblik saradnje može pomoći kako bi se ponovo pokrenuo rast u Evropi? Kakvu ulogu u pronalaženju odgovora na krizu mogu imati parlamenti?

U ime Bosne i Hercegovine, u prvom dijelu sastanka predsjedavajući Doma naroda PSBiH Dragan Čović imao je obraćanje o temi: *Imaju li parlamenti ulogu supervizora u upravljanju eurozonom?*

U svom govoru istaknuo je da je Bosna i Hercegovina još uvijek daleko od članstva u EU, a posebno od članstva u eurozoni, ali je poput svih drugih evropskih država izložena negativnim utjecajima vezanim za finansijsku i ekonomsku krizu u Evropi. Ekonomija Bosne i Hercegovine toliko je vezana i ovisna o ekonomiji EU da je *Standard and Poors* u svojoj analizi našu zemlju svrstao na treće mjesto ljestvice država centralne i istočne Evrope prema izloženosti ekonomije zbivanjima u eurozoni. Ranjivost bh. ekonomije u pogledu zbivanja u eurozoni očituje se u trgovinskoj razmjeni i kretanju BDP-a, te dovodi do povećanja nivoa javnog duga i snižavanja kreditnog rejtinga.

Monetarna politika Bosne i Hercegovine zasniva se na principu *currency boarda*, principu koji podrazumijeva da za bh. valutu postoji puno pokriće u konvertibilnim deviznim sredstvima po fiksnom kursu (1 KM = 0,51129 eura). Vezivanjem vrijednosti bh. valute za vrijednost eura određena je apsolutna povezanost našeg finansijskog sistema s eurozonom, kao i ovisnost o stabilnosti eura.

Upravo iz tih razloga Dragan Čović rekao je da BiH pozdravlja odluke evropskih čelnika iz eurozone o podržavanju plana kancelarke Merkel i predsjednika Sarkozyja o uvođenju obavezujućih pravila usmjerenih ka osiguranju fiskalne i ekonomske discipline, te ekonomskoj integraciji eurozone. Francusko-njemački prijedlog osigurao je stabilnost eura uvođenjem centralne supervizije budžeta država članica, ali i uvođenjem Evropskog stabilizacijskog mehanizma s odgovarajućim kreditnim kapacitetima. Uravnoteženi budžeti država članica eurozone jedini su način na koji se mogu izbjeći buduće dužničke krize i slabljenje eura, te je uvođenje dodatnih kontrola, nadzora, ali i sankcija nužno za opstanak evropske ekonomije, ali i EU uopće.

Na kraju 14. sastanka Asocijacije evropskih senata šefovi delegacija donijeli su sljedeće zaključke:

Šefovi delegacija:

- Još jednom su dali podršku organiziranju i ujedinjenju Evrope i iskazali spremnost da nastave promovirati zajedničke evropske vrijednosti, posebno demokratiju, vladavinu zakona, politički pluralizam, jednakost spolova i poštivanje različitosti;
- Potvrdili su ulogu Asocijacije evropskih senata u razvoju međuparlamentarne saradnje i jačanju vrijednosti dvodromnosti, kao jednog od načina produbljivanja evropske demokratije;
- Zahvalili su Martinu Schulzu, predsjedniku Evropskog parlamenta, za učešće na ovom sastanku.

Šefovi delegacija:

- Smatraju da bi jače upravljanje Evropske unije, posebno u eurozoni, ekonomijom i budžetom doprinijelo stabilnosti i rastu u Evropi općenito;
- Istaknuli su da bi takvo jače upravljanje osiguralo veće učešće i superviziju državnih parlamenata i Evropskog parlamenta, čije su uloge komplementarne, a ne međusobno konkurentne; te stoga napredak ostvaren Lisabonskim sporazumom u pogledu uloge parlamenata u izgradnji Evrope treba podržati i dopuniti, npr., odredbama o

funkcioniranju „evropskog semestra“, jer građani gube povjerenje u demokratiju kada smatraju da odluke na evropskom nivou donosi samo mali broj vlada i tehnokrata;

- Izrazili su želju za istovremenim ulaganjem napora kako bi se budžeti ponovo vratili na zdrave temelje i kako bi rasli.

Šefovi delegacija:

- Istaknuli su da su u svakoj državi, ali i u evropskim organizacijama, u cijelosti legitimne i efikasne samo one politike nad kojim parlamenti provode nadzor i koje imaju podršku parlamenata; također su kazali da jačanje međudržavne saradnje neće biti dovoljno za upravljanje sve većom međuzavisnošću evropskih država;
- Smatraju da ta međuzavisnost treba ići ruku pod ruku s jačanjem međuparlamentarne saradnje kako bi se omogućila razmjena iskustava i stapanje politika koje favoriziraju rast;
- Naglasili su ulogu lokalnih i regionalnih tijela u poticanju poslovanja i zaštiti građana od posljedica ekonomske bijede; u vezi s tim, također su spomenuli ulogu koju nerijetko imaju gornji domovi u uspostavi veza između regionalnih i lokalnih tijela, državnih institucija i evropskih organizacija.

Šefovi delegacija:

- Odlučili su prihvatiti prijedlog Doma lordova Parlamenta Ujedinjenog Kraljevstva Velike Britanije i Sjeverne Irske da se ponovo sretnu u Londonu u julu 2013. godine.
- Podsjetili su da se Senat Parlamenta Holandije, povodom svoje 200. godišnjice, ponudio da bude domaćin okupljanja članova Asocijacije 2015. godine.

Zapisnik uradila:

Senaida Bešlagić